

sa basond sin l'artitgel 36 da la lescha chantunala d'agricultura ¹ e sin l'artitgel 10 da l'ordinaziun d'agricultura ² dal chantun Grischun

relaschè da la regenza ils 8 d'october 2001

I. Disposiziuns generalas

Art. 1 Intent

La scola dat, resguardond spezialmain l'agricultura da muntogna ed il svilup dal territori rural, ina scolaziun a las scholaras ed als scholars ch'als qualifitgescha d'avair success en lur professiun u en ina scolaziun cuntinuanta. Ella promova la furmaziun da la persunalitad da las scholaras e dals scholars ed instruescha la moda da patratgar globalmain.

Art. 2 Purschida da furmaziun

¹ Il center da furmaziun e cussegliaziun agricula porscha en emprima lingia la furmaziun agricula fundamentala.

² Sco percurs da scolaziun vegnan purschids principalmain:

- a) curs da commerzi, da turissem e d'administraziun;
- b) scola da manader da gestiun;
- c) maturitad professiunala.

Art. 3 Lingua d'instrucziun

La scola resguarda adequatamain la trilinguitad dal chantun cun concepir ils plans d'instrucziun e cun dar l'instrucziun. Lingua d'instrucziun è per regla il tudestg.

Art. 4 Custs

¹ L'instrucziun da la furmaziun fundamentala professiunala è gratuita. Davart ils custs per alimentaziun ed alloschi sco er davart las taxas da scola d'auters percurs da scolaziun relascha la regenza in reglament spezial ³.

² A las scholaras ed als scholars vegnan mess a quint ils custs per excursiuns, meds e materialias d'instrucziun.

³ Per ils roms d'elecziun e facultativs sco er per roms che mainan ad in diplom spezial po vegnir dumandada ina participaziun als custs.

Art. 5 Assicuranzas

¹ Igl è chaussa da las persunas cun la tgira dals geniturs respectivamain da las scholaras e dals scholars maiorens da far ina assicuranza cunter accidents durant l'instrucziun a scola, il temp liber e las vacanzas.

² In'assicuranza privata da responsabladad che surpiglia donns visavi la scola e terzas persunas sto vegnir fatga da tut las scholaras ed ils scholars.

Art. 6 Responsabladad

La scola na stat betg buna per la proprietad e per il possess da scholaras, scholars e participants da curs.

Art. 6a ⁴ Surveglianza

La surveglianza da la scola d'agricultura Plantahof è chaussa dal departament.

Art. 7 Organisaziun dal manaschi da scola

La direcziun procura per in'organisaziun convegnenta dal manaschi da scola e relascha las regulaziuns necessarias per quest intent en furma scritta.

II. Direcziun da la scola

Art. 8 Direcziun da la scola

La direcziun da la scola vegn ademplida da la scheffa u dal schef da secziun "formaziun".

Art. 9 Direcziun d'in curs d'instrucziun

Ils singuls curs d'instrucziun vegnan manads d'ina persuna d'instrucziun che vegn designada da la direcziun.

Art. 10 Magistra u magister da classa

¹ La manadra u il manader dal percurs d'instrucziun numna ina magistra u in magister da classa per mintga classa.

² La direcziun definescha las incumbensas da questas persunas d'instrucziun.

Art. 11 Conferenzas da magisters

La direcziun da la scola sco er la manadra u il manader e las magistras ed ils magisters principals dals percurs da scolaziun respectiv furman la conferenza da magisters. Ella vegn presidiada da la manadra u dal manader dal percurs da scolaziun respectiv.

III. Entrada ed extrada

Art. 12 Entrada

¹ La direcziun definescha las cundiziuns d'admissiun, uschenavant ch'i na dat betg regulaziuns d'admissiun surordinadas.

² La direcziun da la scola decida davart l'admissiun.

Art. 13 Extrada

¹ Tgi che vul extrar anticipadamain da la scola, ha da preschentar ina decleraziun en scrit dals represchentants legals. Scholaras e scholars maiorens suttascrivan sezs la decleraziun en scrit.

² La scola po metter a quint cumplainamain las taxas da scola che ston vegnir pajadas eventualmain per il semester cumenzà.

³ Per percurs da scolaziun frequentads incumplettamain na vegn per regla betg dà in attestat.

IV. Frequentaziun da la scola

Art. 14 Preschientscha

Las scholaras ed ils scholars èn obligads da frequentar tut las lecziuns d'instrucziun ed occurrenzas che vegnan purschidas da la scola sco roms obligatoris u roms d'elecziun obligatoris.

Art. 15 Dispensaziun

Sin dumonda motivada decida la direcziun da la scola davart ina dispensaziun. Questa dispensaziun po vegnir colliada cun cundiziuns e pretensiuns. Ina dispensaziun na dat betg il dretg d'ina restituziun dals custs per l'alimentaziun, l'alloschi u per taxas da scola ch'èn eventualmain vegnidas pajadas.

Art. 16 Absenzas

Cun s'inscriver en il cudeschet d'absenzas motivescha la scolara u il scholar sia assenza. Absenzas fin ad in mez di visescha la magistra u il magister da classa, absenzas pli lungas la manadra u il manader dal percurs da scolaziun.

V. Internat

Art. 17 Internat

Ensemen cun la scola vegn manà in internat. La scolaziun po vegnir frequentada a l'internat, al mez internat u a l'externat.

Art. 18 Direcziun

La direcziun designa la manadra u il manader da l'internat.

VI. Promoziun ed attestat

Art. 19 Promoziun

La conferenza da magisters dal percurs da scolaziun correspondent decida davart la promoziun e quai sin fundament da las prestaziuns. Ils reglaments da promoziun respectiv reglan ils detagls.

Art. 20 Attestats

¹ L'attestat valitescha las prestaziuns e las cumpetenzas da las scholaras e dals scholars. El serva a l'orientaziun dals geniturs, da las scholaras, dals scholars e dals patruns d'emprendissadi.

² Ils represchentants legals vegnan infurmads mo, sche la scolara u il scolar è minorenn u sch'ella u el ha dà a la direcziun da la scola ina autorizaziun en scrit per far quai.

³ L'attestat sto vegnir suttascrit da la persuna ch'è vegnida autorizada legalmain da far quai. I pon vegnir consegnads rapports intermediars.

Art. 21 Taxas d'examen

Per ils examens en la furmaziun fundamentala na vegnan incassadas naginas taxas. Per tut ils auters examens sa drizza la tariffa tenor ils reglaments d'examen respectivs.

VII. Cumportament en scola e sin l'areal da scola

Art. 22 Reglas da cumportament

Il cumportament en scola e sin l'areal da scola duai esser caracterisà da fairness, toleranza e respect vicendaivel. Las scholaras ed ils scholars èn obligads da suandar las directives da la direcziun da la scola, dals magisters e dals collavurats.

Art. 23 Fimar e baiver

Sin l'entir areal dal Plantahof èsi scumandà da consumar alcohol e da fimar. La direcziun po permetter excepziuns.

Art. 24 Cauziun

Las scholaras ed ils scholars ston deponer ina cauziun a l'entschatta dal semester. Ils custs per eventualas perditas da clav e per eventuals donn en l'internat pon vegnir deducids da la cauziun.

VIII. Chastis ed autras mesiras

Art. 25 Chastis

¹ Sche las scholaras u ils scholars violeschan l'urden da scola u ses decrets executivs u sch'els n'observan betg las directives da la direcziun, dal manader da la scola u dals magisters e dals collavurats, vegnan els chastiads cun reprimanda u cun chastis.

² Per ademplir il chastis ston las scholaras ed ils scholars survegnir in'occupaziun raschunaivla.

Art. 26 Mesiras

¹ L'exclusiun da la scola u da l'internat po vegnir smanatschada (ultimatum) u disponida, sch'ina scolara u in scolar:

- a) violescha grevmain l'urden da scola, il reglament da chasa u la disciplina en scola;
- b) periclitescha la cuminanza da scola u singuls scholars;
- c) donnegia cun malart mobiglias e material da scola;
- d) consumescha, posseda u commercialisescha drogas illegalas u fermas;
- e) ha engulà objects da la scola u da conscolaras e conscolars.

² Ina exclusiun da l'internat po vegnir disponida er temporarmain.

Art. 27 Consequenzas da l'ultimatum

Sch'ina scolara u in scolar daventa chastiabel malgrà la smanatscha d'exclusiun, vegn fatga la dumonda d'exclusiun.

Art. 28 Cumpetenzas

¹ Ils chastis vegnan dads da la direcziun da la scola u dals magisters. Las magistras u ils magisters dastgan pronunziar chastis da fin duas uras, la direcziun da la scola u da l'internat chastis pli lungs.

² In ultimatum u l'exclusiun da l'internat vegnan disponids da la directura u dal directur.

³ Davart l'exclusiun da la scola decida il departament. La dumonda sto vegnir fatga da la direcziun.

Art. 29 Attenziun giuridica

Las scholaras u ils scholars che vegnan chastiads pon pretender ina discussiun persunala cun la magistra u il magister da classa, cun la direcziun da la scola u cun la directura u il directur.

Art. 30 Comunicaziun

La reprimanda, l'ultimatum e l'exclusiun ston vegnir communitgads en scrit cun indicaziun da las pussaivladads da far recurs. Per scolaras e scolars minorens vegn fatga la communicaziun er al represchentant legal ed a la patruna u al patrun d'emprendissadi.

Art. 31 Meds legals

¹ Cunter chastis disponids po vegnir fatg recurs aifer 10 dis tar la directura u il directur.

² Cunter chastis u decisiuns da la directura u dal directur po vegnir fatg recurs aifer 10 dis tar il departament.

IX. Entrada en vigur

Art. 32 Entrada en vigur, aboliziun dal dretg vertent

Quest urden da scola entra en vigur il 1. da november 2001 e remplazza quel dals 11 da fanadur 1977⁵.

annotaziun finala

- 1 DG 910.000
- 2 DG 910.050
- 3 DG 919.300
- 4 integrà tenor l'art. 1 cifra 21 da l'ordinaziun davart la delegaziun da cumpetenzas da la regenza als departaments ed als posts da servetsch, DG 170.340; entrà en vigur il 1. da schaner 2009
- 5 CUL 1977, 192, CUL 1985, 1417 e CUL 1993, 2739